

Simon Derungs

Sas Ti raquintar in tec digl origin da Tia famiglia?

Mes geniturs ein carschi si omisdus a Surcasti. Miu tat davart dalla mumma era in Camenisch da Morissen e mia tatta ina Albin da Tersnaus. S'entupai ein els dus el tmps ch' els mavan per hotels a Lucerna. Cu els ein maridai ein els secasai igl emprem a Morissen. Els ein allura vegni a Surcasti a habitar, dama ch'els possedavan leu ina quarta d'ina casa. Els ein i vinavon zatgei per hotels e silsunter stai a casa ed entschiet a far in tec il pur. Mia mumma ei carschida si ensemen cun in frar a Surcasti. Ella ha absolviu cuors dil tenercasa a Sargans e lu puspei turnada a casa. Il tat davart da miu bab era scolast e pur. Miu bab ei suenter la scola populara staus zatgei giu Turitg a luvrar ed ei allura turnaus beinspert puspei a Surcasti. Leu el ha fatg entgins onns il fumegl el menaschi puril da miu tat ch'era morts prematuramein cun 59 onns. El era il giuven dils buobs d'ina famiglia da 14 affons ed ei aschia restaus leu cun la tatta ch'era vegnida vieua ed in frar ledi. Entgins onns suenter la maridaglia han els entschiet a far il pur sur sesezs. Da quei temps deva ei el menaschi puril neginas maschinas auter ch'in motor da segar, aschia ch'ei ha tuccava da far bia a maun.

Era Ti eis carschius si en ina gronda famiglia.

Nus essan stai ina famiglia da 10 affons, 7 mattatschas e 3 buobs. Sco secund vegl ha ei giu num da s'engaschar fetg baul el menaschi puril sorprendend certas lavurs en atgna responsablidad. La scola cuzzava da lezzas uras da miez october tochen miez avrel. Gia l'auter gi veva ei num ir ad arar. Sco buobet e fegl vegl dalla famiglia vevel jeu era il pensum d'empalar ils bos tier trer grascha ed arar. Quei era nuota adina aschi sempel. Duas gadas eran ils bos sespuentai, ina gada cul carr da grascha ed ina ga cun crie e tut. Jeu

erel vegnius sut il carr en, per cletg eis ei denton buca schabegiau pli bia. Quei era denton experienzas che schevan anavos respect ed era ina certa tema. Damai ch'ils fargliuns pli giuvens vegnevan suenter egl agen menaschi ha ei tuccau a mi dad ir beinspert en piazza. Il matg ed igl atun era ei da pertgitar la biestga vi Crestaulta ellas aclas da Vignogn. Cheu deva ei paucas seivs e mintgin stueva pertgitar il muvel sil siu. Suenter ils treis d'october stuevan nus denton turnar cul muvel a Surcasti, damai che Vignogn gudeva lu la pasculaziun cumina, dalla quala ils d'ordeifer vevan negin dretg.

Buobs da purs mavan savens la stad ad alp. Ei quei era stau il cass tier Tei?

Giebein. Tut en tut sun jeu staus 5 onns ad alp. Damai che jeu pitevel empau dalla struha da fein, hai jeu giu nuot encunter dad ir la stad ad alp.

L'emprema gada sun jeu staus cun 9 onns ella Alp Gretg da Duin. Quei era ina alp che vegneva alpegiada da rodund 40 vaccas e da rodund 40 genetschas e vadias. Si d'alp eran nus en quater, dus carschi e dus buobs. Cunzun all'entschatta dalla stad era quei ualti stregn. Jeu stuevel levar la damaun allas 03.30 ed ir a rimnar las vaccas e catschar ellas en stavel per mulscher. Sche neginas muncavan saveva il buob allura turnar en treglia duront ch'ils auters mulschevan. Sin ch' ils auters vevan finiu da mulscher veva il buob da far solver per la fumeglia. Aschia hai jeu empriu bien e baul da far pulenta, marcaruns e buglia d'aunghels. Quei mava detg stupent.

Suenter solver havevel jeu da trer ensemen cul signun ina gronda panaglia, per aschia producir la pischada. Quei era ina lavur detg strentga per in buobet da nov onns. Plinavon vevel jeu il pensum dad ir per aua, damai che la tegia era buca colligiada cul provediment d'aua dall'alp. Cheu tuccava ei da haver adatg da buca sponder, damai che la tegia schischeva sin pigiament, cass

cuntrari deva ei buglia ed ei era prighel da selischnar ora. Damai ch'il paster prefereva plitost da star en tegia che da pertgitar vaccas e stiarls, tuccava ei a mi da sorprender quella lavur. E quei da tutta aura. Seivs vevan nus si d'alp neginas da gliez temps. Per gentar prendevel jeu cun mei in toc paun ed in toc caschiel, damai che jeu turnavel da miezgi buca anavos en tegia. Da macort' aura havevel jeu la pusseivladad dad ir si ella tegia dil nurser e da magliar leu ina suppa caulda. Quei emprem onn si d'alp hai jeu schon schau empau en crescher.

Dat ei in eveniment ch'ei restaus a Ti specialmein en memoria durant lezza stad silla Alp da Duin?

Durant la stad capitava ei magari ch'ina vacca ni l'autra giugava ed jeu stuevel menar ellas ora el vitg tiel taur. Ina sera era ei vegniu tard, ed jeu hai saviu turnar pér da stgirenta notg ell'alp. Damai ch'ei era da traversar in stgir uaul, hai jeu schon temiu empau e vesevel spérts davos mintga cuscha. Sco buob da nov onns veva quei schon fatg a mi ina gronda impressiun ed effectuau dabia snuezi.

La veta da pastur sto denton haver plaschiu a Ti, pertgei ils onns suandonts eis Ti turnaus ad ir ad alp. Co ei quei stau?

Igl onn proxim era ei previu che jeu stetti a casa e gidi a far fein. Damai ch'ins veva treis gis avon la cargada denton aunc negina fumeglia en l'alp Ampavreila en Val S. Pieder, ha miu bab pladiu mei e miu frar pign da 7 onns sco starlers. Nus dus havevan da haver quita persuls da rodond 60 tgaus biestga schetga. Miu bab aveva denton giu teniu ora che nus astgien ir a magliar ella tegia dalla alp da vaccas e cauras, aschia che nus stoppien buca procurar per la maglia e cuschar sez. Persuenter havevan nus da gidar a mulscher las 60 cauras e quei sera e damaun. Fertan che jeu hai buca giu difficultads cul mulscher, fageva quei grond

fastedi a miu far pign ed el veva la detta tut marvla e plagas aviartas. Il gi ora vevan nus da pertgitar la biestga sin la vasta pastira d'alp. Per gentar deva ei magari ina sardina cun paun e caschiel ed ina butteglia latg che nus predevan cun nus la damaun. Ils onns proxims han ins buca cargau pli vaccas en quella alp, mobein rodond 120 tgaus biestga schetga. Ensemen cun miu frar ni in auter buob hai jeu pertgira quella muaglia las proximas treis stads. Si d'alp havein nus stuiu emprender spert dad esser sur sesez e da sorprender baul responsabladad. Tut en tut sun jeu staus tschun onns ad alp.

Da quei temps mavan sulet umens e buobs ad alp. Sco ins raqueta hagi el magari era dau fridas, violenza ed abus sexuals en quella cumposiziun virila. Tgei experienzas has Ti fat en quei grau?

Jeu persunalmein sun mai staus confruntaus cun tals acta da violenza ed abus sexuals. In da mes frars ha denton stuiu pitir malamein sut in pastur rubiesti cun ina tenuta bunamein sadistica. Per igl atun ha el la finala ughegiu da raquintar a casa tgei ch'era schabegiau. Il culpont ei la finala vegnius tgisaus ed ha survgniu il castitg meritau.

Tgei regurdientschas has Ti dil temps da scola?

Suenter ils sis onns scola primara a Surcasti hai jeu frequentau la scola secundara ch'era vegnida aviarta entgins onns avon ad Uors. Quels che fagevan buca la scola secundara frequentavan las classas finalas ella scola dil vitg.

Damai che la scola secundara entschaveva entgins gis avon la scargada, muncavel jeu mintgamai ils emprems gis da scola. Vacanzas deva ei aschia secapescha neginas. Il problem era il lungatg tudestg. Nus eran stai ad alp, vevan empiru empau il dialect da Val, fertan ch'ins vess stuiu s'exprimer en scola el lungatg da scartira. Cheu deva ei magari detgas

risadas e beffas dils conscolars pervia da nies patua gualser. Perquei vevel jeu magari era retenientschas da s'exprimer. En scola secundara ad Uors eran nus da lezs onns entuorn 25 scolars reparti en treis classas.

Co eis ei stau culla elecziun da clamada?

Sco fegl vegl vess jeu magari giu interess da far il pur. Miu bab ha denton manegiau che quei seigi nuot per mei cun mia struha da fein. El vuleva exnum che jeu mondi alla Scola cantunala e damenti scolast, sco quei che era miu tat era staus. Miu frar pli giuven seigi empau pli fermes ed aschia pli adattaus da far il pur, haveva bab manegiau. Jeu vess denton giu mustgas da sunar harmonica da quei temps ed hai detg che jeu seigi pia prompts dad ir alla scola cantunala, denton mo sche el cumpri per mei ina harmonica. Per motivs finanzials ha el denton renviu quei giavisch. Aschia che quei tema ei staus, silmeins pil mument, giud meisa. Duront il temps da scola zambergiavel jeu magari bugen cun differents materials. Aschia vevel jeu giu endrizzau en hisli ina cazzola cun batteria ch'ins saveva envidar e stizzar cun ina guota. Quella invenziun veva lu era purtau a mi il surnum "electricher". Suenter ch'il cusseglader da clamada veva giu enderschiu da quei experiment ha el manegiau che jeu duessi far in emprendissadi tier la Landis&Gyr a Mustér. Quels lavurien cun apparats electrics ed enquerien adina puspei emprendists.

Miu bab era zuar nuota propi incantaus da quella proposta, mo per mei constava ella. Ils emprems dus onns d'emprendissadi hai jeu absolvii el menaschi a Mustér ed ils dus suandonts ella centrala a Zug. Leu hai jeu giu la pusseivladad da frequentar differents cuors da perfecziun sil sector dalla electronica ed havevel plascher da quella professiun.

Ti ei denton tuttina sedicidius da turnar beinspert anavos a Surcasti?

Jeu sun adina staus fetg rentaus ed attaschaus al vitg patern, schavel schon empau encrescher e turnavel aschia mintga fin da jamna a casa. Jeu havevel era l'intenziun da puspei turnar aschi spert sco pusseivel en Surselva. Damai che la firma Grob ch'era gest s'establida a Glion encureva da quei temps luvriers sun jeu s'annunziaus ed hai survegniu la piazza. En quella firma sun jeu sespecialisau principalmein silla contrucziun d'utensils ed hai luvrau leu cun plascher plirs onns e saviu emprendre in tschuppel caussas novas.

Ei era denton adina da luvrar endadens, quei che plascheva meins a mi. Aschia hai jeu encuretg ina nova piazza. Duront 10 onns sun jeu allura staus engaschaus tier la firma Schulthess sco emploiau da servis e reparaturas da maschinas da lavar egl entir cantun Grischun. Cul temps vegnevan ils liungs viadis adina pli stuffis e stentus. Damai che la «Gross- und Leihwäscherei» a Glion encureva gest in mecanist da maschinas sun jeu s'annunziau ed hai survegniu quella piazza. Quella funcziun ei stada colligiada cun grondas midadas tecnicas. El temps da sesiun aulta tuccava ei magari da luvrar 6 gis ad jamna e 12 uras a gi, per allura saver cumpensar las sururas en periodas pli ruasseivlas.

Duront 10 onns sun jeu staus menader dalla producziun da quei menaschi. Quei ei stau in stregn, denton bi temps cun ina buna collaboraziun cul persunal che derivava lu per gronda part ord la regiun. Damai che la tecnica vegneva adina pli cumplicada e la lavur adina pli pretensiusa sun jeu staus leds da haver saviu ir anticipadamein en pensiun. Aschia hai jeu finalmein giu dapli temps per sededicar pli intensivamein a mes hobis: la musica e la historia.

Lein discuorer igl εμπrem dalla musica. Ti eis staus fundadur e biars

onns dirigent dalla Musica instrumentala da Suraua. Co eis ei vegniu aschi lunsch?

A Surcasti vevan nus negina musica. Jeu sun denton adina staus in fanaticher da musica da stuors. Per mei era ei mintgamai in eveniment tut special sche la Musica da Vignogn vegneva giu Surcasti per embellir ina fiasta ecclesiastica ni l'autra. Era mavel jeu stedi a concerts dallas musicas dil contuorn.

Cu jeu sun turnaus si Glion hai jeu finalmein giu la pusseivladad d'emprender da sunar in instrument e sun allura entraus beinspert ella Musica dil marcau da Glion. Jeu erel in grond fanaticher e trenavel mintga sera a casa e hai cheutras survegniu ina buna buccatura. La finala hai jeu sunau 9 onns ella Musica da Glion. A Suraua vessen entgins camerats era giu gust d'emprender da sunar in instrument. Perquei vein nus batlegiau entgins instruments vegls da differentas musicas existentas. En ina pintga gruppa havein nus empriu da sunar different instruments e preparau treis chorals che nus vein allura sunau sco sorpresa a caschun d'ina sera famigliara. La sorpresa ei gartegiada ed ei ha dau persunter in grond hallo el publicum.

Quei ha animau da cuntinuar e la finala motivau da fundar igl onn 1978 la Societad da musica Suraua cun buca meins che 17 interessents. Era la populaziun ha susteniu nus fetg, cunzun era finanziamein. 1982 vein nus dau igl emprem concert ensemien cul giuven Chor mischedau Suraua. 1981 vein nus sunau l'emprema ga da cumin e 1983 vein nus priu part per l'emprema ga a Flem cun bien success ad ina fiasta da musica. Tut en tut sun jeu staus 46 onns en las musicas da Glion ni Suraua e la finala era dirigiu sez buca meins che 27 onns la Musica da Suraua.

Ti ei naschius e carschius si a Surcasti. Quals eran ils eveniment impurtants el vitg puril da lezzas uras?

Quei eran principalmein las fiastas

ecclesiasticas, cunzun Sontgilcrest e Perdanonza. A caschun da quellas duas fiastas fagevan ils mats parada en mondura militara e las mattas fagevan tschupials per la baselgia e purtavan sezzas era tschupi. Da Sontgilcrest vegnevan ils ueibels ch'eran gest ord scola recepi ella Cumpignia da mats, pli tard ella Uniun da giuventetgna. Surcasti ed Uors han adina giu fatg parada cumineivlamein, damai ch'ils dus vitgs formavan ensemien la pleiv da S.Luregn. Il capitani mava en turnus, dus onns a Surcasti ed in onn ad Uors. La sera da Sontgilcrest envidavan ils mats las mattauns «a beiben». Secapescha che quei succedeva en presenza dil plevon che fuvava era preses dalla uniun. Da quellas sentupadas vegneva magari era cantau e saltau. Suentier mesanotg mavan nus mats en pitgas gruppas a puschegn a casa tier las mattauns. Pli tard han ins organisau seras famigliaras, che eran denton resalvadas, per motivs da plaz mo als carschi. Leu fageva la giuventetgna lu era teater. Culs daners recaltgai fagevan nus mintgaton in pign viadi. Ord l'Uniun da giuventetgna fundada 1972 ei la finala era il chor mischedau Suraua naschius. Suentier la reuniun dallas scolas e la realisaziun dalla casa da scola nova comunabla ad Uors han ils vitgs da Suraua fatg leu comunablamein sera famigliara.

Ti eis lu la finala maridaus e secasaus ad Uors?

Jeu erel ferm ligiaus cun Surcasti. Damai che mia dunna fageva la Posta ad Uors essan nus lu era sedecidi da secasai ad Uors ella Casa dalla Posta. Leu vein nus habitau 17 onns e giu duas feglias. Fertion che mia dunna fageva la Posta, mavel jeu a Glion a luvrar. Pli tard havein nus baghegiu ina casa nova si Planezzas. Nus vein gudiu la veta da famiglia, essan i bia a spass e gudiu nos hobis.

Ti denton era staus engaschaus ella pleiv ed ella vischnaunca?

Sco emprems uffecis hai jeu giu surpriu il presidi dalla pleiv, cunzun en vesta alla restauraziun dalla baselgia parochiala da s. Luregn ch'era sin rucca. Schegie che la restauraziun ha custau a mi dabia gnarva ha ella svegliau en mei igl interess per la historia. Duront mui presidi vein nus era cumpletau e remplazzau il tuchiez existent cun dus zenns novs. Pli tard havein nus schizun saviu acquistar in zenn grond per cumpletar igl accord. Quei ei stau pusseivel grazia ad ina generusa donaziun.

Il s uffecis politics eran buca tschercai ella vischnaunca dad Uors/Peiden, aschia ch'ei ha era tuccau a mi da s'engaschar leu ella suprastanza communal. Aschia hai jeu fatg part duront total 14 onns da quella. Duront 5 onns su jeu stau president communal. Ad Uors era la glieud en general fetg liberala e raschuneivla. La vischnaunca ha aschia mai duvrau in giurist per lugar dispettas. Entgins onns hai jeu era fatg part dalla Dertgira circuitala dalla Lumnezia.

Sco historiograf local ei Ti era sededicaus intensivamein allas genealogias dallas famiglias, dils cussadents dallas casas da Surcasti e dalla historia e cultura da Suraua. Tgei ha dau a Ti igl impuls persuerter?

La historia locala ha adina interessau mei. Suentar la pensiun hai jeu giu dapli peda da s'approfundar ella materia. El rom dalla Pro Suraua vevel jeu giu teniu in referat che ha interessau in vast publicum, quei che ha allura motivau mei da s'occupar aunc pli intensiv culla historia dil vitg da Surcasti, culla pleiv da Uors/Surcasti, cul Bogn da Peiden e culs vitgs da Suraua. Jeu hai era giu

l'ocasiun dad ir sils fastitgs dils emigrants da Surcasti ella America. Suentar che mias duas niazas Silvana e Daniela ein sepurschidas da segidar hai jeu la finala ughegiu d'edir la publicaziun "Da temps vargai. La historia da Surcasti/Suraua".

Ti eis denton era staus igl iniziati digl Archiv cultural Lumnezia?

En Lumnezia han ins adina puspei udiu ch'ei fuss cunvegnent da rimnar caussas e documents vegls avon ch'els mondien en emblidonzha e vegnien dismiss. En connex culla emigraziun hai jeu era giu contact cugl archivar communal Tujetsch Tarcisi Hendry. Lez ha animau mei da far enzatgei semeglient en Lumnezia. La damonda cardinala ei denton stada nua installar quei Archiv cultural lumnezian. Jeu hai dau d'entellir che jeu fussi sut circumstanzias prompts da realisar e tgirar quei archiv sche quel vegni installaus a Suraua. Il s responsabels han la finala dau triev a quei giavisch, aschia che jeu hai saviu rimnar el decuors dils davos 7 onns dabia material ed installar igl archiv en ina stanza dalla anteriura Casa da scola ad Uors.

En Lumnezia fuorma Suraua il cunfin denter Romontschs e Gualsers. Co ein las relaziuns denter quellas duas culturas sesviluppadas el decuors dil temps?

Cun Val veva Suraua, denton era Cumbel e Degen, bia contact cunzun damai che purs da quellas vischnauncas cargavan lur muaglia sin las alps da Val S. Pieder. Quei cunzun en Leis e Selva, singuls purs era en Lenta, Canal, Frunt, Ampervreila e Lampertschalp. Da l'autra vart deva ei antruras alla via da Glion a Val S. Peder buca meins che siat ustrias. Cunzun il Bogn da Peiden, denton era Uors, eran loghens da sentupada apprezzai denter Romontschs e Gualsers. El Bogn da

Peiden fageva il chor viril Lumnezia ses exerchezis da cant, leu vevan las radunonzas da partida e cumin liug, denton era nozzas e pasts da bara vegnevan survi leu. Magrad il scamond da maridar decretaus 1457 ha ei adina puspei dau singulas maridaglias denter Romontschs e Gualsers. Ils hofs da S. Martin vevan bein in' atgna scola primara, la scola secundara frequentavan scolaras e scolars denton ad Uors. Ils uclauns gualser da S. Martin formavan era ina pleiv cumineivla cun Tersnaus. Oz ein la relaziuns denter Gualsers e Romontschs bunas. Beinequal vischin da Suraua anfla oz occupaziun a Val S. Pieder, seigi quei tier Avas da Val, el hotel Therme, vid las Pendicularas ni en las interpresas da baghegiar.

A Suraua ein las geometrias politicas semidadas savens. 1963 fusiuneschan Peiden ed Uors tier Uors/Peiden, 2002 Camuns, Tersnaus, Surcasti ed Uors/Peiden tier Suraua e 2013 Suraua tier Lumnezia. Co giudicheschas Ti persunalmein quei svilup ?

La fusiun da Suraua ei semadirada successivamein. Ei ha entschiet 1968 culla nova Casa da scola comunabla ad Uors. Cuort suenter ein ton il Chor da Suraua sco la Musica da Suraua naschi e pli tard ein era las uniuns da giuventetgna s'unidas. Ins suna e conta ensem, fa cumineivlamein fiastas ed ha aschia saviu migliurar il contact e la cooperaziun denter ils vitgets da Suraua. Aschia astgan ins dir che la fusiun da Suraua ei stau in fetg bien pass che ei era secumprovaus e seconsolidaus el decuors dils 11 onns che la vischnaunca da Suraua ha existiu. Vischinas e vischins dallas fracziuns da Suraua mavan stedi a radunonza ed in segidava in cun l'auter.

Ella damonda dalla fusiun da tut las 8 vischnauncas dalla Lumnezia romontscha sun jeu staus empau pli sceptics. Jeu sun buca staus totalmein encunter, denton era buca fetg scaldaus persunter. Per mei fuss

Suraua stau in perimeter optimal. Il gi dalla votaziun sun jeu staus egl exeriur ed hai aschia buca saviu votar. Jeu hai denton acceptau la decisiun democratica ed hai era cooperau vinavon, prendend stedi part dallas radunonzas communalas che han liug a Vella.

Tier ina fusiun eis ei denton facticamein aschia ch'il center profitescha, ferton che la periferia vegn negligida empau. Gest en connex culla planisaziun locala eis ei deplorabel che las zonas da baghegiar dils singuls vitgs perifers vegnan reducidas drasticamein. La participaziun allas radunonzas communalas ei sereducida marcantamein dapi la fusiun. Era la promptadad da surprendre uffecis communalas ei tschessada marcantamein. Jeu sun dil meini ch'ins stuess respectar dapli il singul burgheis enteifer la vischnaunca fusiunada.

Ti eis era staus biars onns president dalla pleiv. Co giudicheschas Ti la situaziun actuala e vegnenta sin plaun ecclesiastic?

La religiun ei e resta per mei in'impurtonta petga ed ina directiva empalonta. A mi fa igl avegnir dalla Baselia schon empau quitaus, quei buca exnum per il motiv che adina pli paucs van en baselia. En quei grau han ins bein surfatg empau pli baul. Il pli fetg dil desinteress actual piteschan la cuminonza e la cultura. Ins sto era renconuscher igl engaschnent dalla baselia sil camp dalla scolaziun e dalla lavur sociala. Ditg avon il stadi ei la Baselia s'engaschada per la scolaziun dil pievel, ella ha fundau spitals e casas da vegls ed ella ei s'engaschada per numerusas ovras socialas e caritativas. Bia glieud ha prestau bia lavur voluntaria e gratuita. Quei ei veramein stau in agid vicendeivel en favur dils fleivels en nossa societad.

Damai ch'ils geniturs van buca pli en baselgia, eis ei buca da sesmavegliar che era ils affons mauncan. La cuminonza dat aschia adina dapli dapart en nos vitgs. Era la Baselgia sezza sto denton empruar dad ir cul temps. Cunzun meretan las dunas dapli atenziun e renconuschientscha. Jeu sedamondel era tgi che mantegn in gi nos custeivels edificis sacrali sche adina dapli sortan dalla Baselgia.

Co vesas Ti igl avegnir economic dalla Lumnezia?

Per la Lumnezia en general vesel jeu tuttavia in bien avegnir. Cunzun las vischnauncas da Cumbel, Morissen, Vella, Degen e Vignogn ch'ei fetg maneivlas ina da l'autra han in bien svilup economic. Mender stat ei en quei grau cun Lumbrein che era pli

baul la pli gronda vischnaunca lumneziana e cunzun culs loghens perifers sco Vrin e Suraua. Ella gronda part dils vitgs lumnezians dat ei oz dapli abitaziuns da vacanzas che abitaziuns occupadas d'indigens. Quei dat a mi schon da patertgar. Biars giuvenils han buca pli interess da fundar famiglia, secasar el vitg, renovar las casas veglias ed entrar ellas uniuns. Era la vischnaunca stuess nezegiar el avegnir meglier sias atgnas localitads publicas e sestentar dapli per crear abitaziuns pagablas per indigens. Legreivel ei denton che nus vein en nos vitgs lumnezians biars pendularis che lavuran bein ordeifer, che mantegnan denton lur domicil el vitg e dattan aschia veta a quel.

Intervista: Martin Cabalzar